

序

憶自同治甲子之秋奉

命巡潞見夫阡塍衍沃有羅紈畫卦之腴風氣
武健有豪邁俊爽之致物產生植有魚鹽畜牧
之饒川澤滙流有白浮通惠玉泉之注且東南
漕粟之供海舶江艘帆檣綆屬是州也實為左
輔雄藩

天庾重地舟車所駢集水陸所交衝民物滋豐

人文蔚起下及旗莊牙錯五方雜處星軺郵遞
之送迎案牘簿書之繁劇此而不有志乘以紀
之縷晰以詳之殆有日久就湮闕如紀載奚以
為文獻之留遺將來之考据乎良自下車至今
十有六年竊幸四境晏如與民休息公餘之暇
適州牧高君建勳以續修通州志書為請良謂
其勤求治理也乃亟與司馬郝君聯薇督之佐
之並延諸文學士分續舊志纂輯成編又公捐

集款自光緒四年九月至五年八月工竣凡有關於土疆習俗風化物產人文學校河渠水利漕運諸大政其時會之變遷事勢之沿革靡不搜羅採訂網舉目張即此已足見高君之留心民事若此也良樂觀其成而所以繼前人之矩矱留後人之稽考者亦於是乎備焉是為序
光緒五年歲次己卯八月布政使銜直隸通永兵備道英良謹識

攷通州於西漢為路縣於東漢為潞縣彭
寵拜漁陽太守治潞則又為郡治金天德
間升潞縣為通州元明建置不一及我

朝定鼎廢灤縣以益是州而版圖之廣戶
籍之盛倍於曩時况是州上拱

神京下控徐兗襟河帶海為

國家轉漕之通衢凡川原藪澤之雄魚鹽
畜牧之利旂地屯田之所紛錯水舟陸車

之所往來固

天府之奧區左輔之雄藩也已卯夏余奉
檄忝攝監司下車之始值州志脩輯將成
曾何幸而得逢其盛也夫是書創始於前
朝康熙乾隆間一再搜葺廢墜咸舉凡山
川之沿革疆里之阨塞物產之盈虛市井
之散集以及貢賦倉儲之設施風俗政教
之得失亦可以傳之後世以示勸戒而繫

人心之好惡矣道光己亥何君耿繩李君
宣範欲續脩而未果迄今又四十年矣星
霜改移兵燹剝蝕徵文攷獻遺老彫謝當
此之時若不捃摭舊聞以備將來之考鑒
將廢佚叢咎無得而辭光緒紀元以來大
府奏請續脩畿輔通志爰令各屬脩舉時
鄒德雲司馬在人權篆是邦即捐廉以為
之倡繼之者為郝近垣聯薇牧是州者為

高星槎建勲遂延王君維珍諸名宿分任纂輯補益遺亡而是書文增事益較前書為詳備固守土者之所樂觀而亦都人士之所協力以成也且夫是區亦雄傑矣觀吳漢耿弇之破五幡銅馬也則風雨冥晦如聞金戈鐵馬之酣呼也覽郭守敬之經營通惠河也則水陸衝會如見沙鷗檣鳥之飛集也至若居庸平峪之所襟控玉泉

白浮之所滌洄則又攬關塞之險阻弔陳
跡之未湮俯仰憑眺上下千古而不禁為
之欷歔及覩我

國家聖化濡涵專營翔洽九省委輸舳艫
萬里上供

天庾家給人足其築防脩濬之經壩閘丁
額之設而蔚為弦歌之化以濯沐

日月之光者彬蔚魚雅超軼前代能不鼓

舞懼忻更為斯民幸哉書既脫藁剗刷之
資缺如遂偕郝君聯薇高君建勳各捐廉
俸以速其成俾輜軒採擇以備

聖世金匱石室之儲他日雕工既竣郵編
相示恍若與諸君勸課農桑敦尚禮俗而
兢兢惟恐弗盡厥職是亦余之大幸而深
有望於諸君者也爰不揣固陋而為之序
光緒五年歲次己卯仲秋月

誥授資政大夫二品頂戴署通永河務兵
備道鑑湖任信成敘

序

予服官畿輔垂三十年矣官迹所經輒詳
求志乘謂其足以備考稽而資治理也辛
未夏委權東路同知而通州實隸焉且官
署所駐也雖偶然承乏亦就職分之所當
為者為焉而已矣時
大府有奏請續修畿輔通志之舉因分命
各屬悉加纂輯是州也為

神京左輔其間關塞之保防疆域之建置戶

口之鱗集財賦之徵收以及士習民風天
運地產文章經濟忠孝節義一切可述可
傳之事宜垂諸久遠者較他邑為倍不有
以志之後世烏乎考况漕運倉儲旗地屯
田河渠諸大政尤於斯地有所關屬而乃
聽其誌載無徵流傳遂替可乎哉粵稽舊
志在前明時草創於宏治修刊於嘉靖逮

八

國

朝以來康熙三十六年則有吳公立菴宗
閻公興邦志稿十三本而損益成編乾隆
四十八年則有高公吾莊踵吳志而增刪
改易道光十八年則有何公耿繩李公宣
範僅增新序而續修則未及焉迄今歷時
愈久積事愈多政治沿革今昔異同際此
弗修恐日就蕪沒此

諸憲府之所由殷然動念而敦勉厥屬以
所當為者也第自風霜剝蝕兵燹凋殘故
板久已遺亡無從裒集今則沿舊志而蒐
佚補缺擘新志而增文益事其任繁總舊
作新修付諸手民咸登黎棗其費鉅不憚
繁且鉅而務求其成斯固司牧者之職抑
亦州人士之共當經畫者也予乃捐廉百
金先為之倡申請開局州之官紳士民亦

樂飲助贊襄弗吝財弗惜力復延邀老成名宿如李君煥文程君杰毛君毓璘劉君湖者或司採訪或任纂述分體立製井井有條詳略適中雅俗共曉候選刺史李君錫文加以董率不期年而此州之志將次成帙時予亦卸篆去矣諸君子爰囑序於予不揣固陋而志其原委如此以見衆力之相與有成俾予得盡所當為以仰副

上游之命者其來有自後之官斯土者克
踵而修之則是志也亦猶吳高諸公之導
厥先路也夫

誥授中議大夫花翎三品銜補用道候補知府

署東路同知順天西路同知卓異候補知府
錢塘鄰在人序并書

通州志序

環

國門而州者三惟通為近且劇陸走渝
關水沿津海東畿三省南服九布政
司所屬轉漕之達於畿甸者莫不於
通縮轂其口倉部於茲開府學政於
茲案臨分巡於茲駐節糧廳於茲坐